



KENYATAAN MEDIA

KANDUNGAN BERUNSUR PROVOKATIF DI MEDIA SOSIAL DITANGANI SEGERA

Alhamdulillah, Mesyuarat Kabinet Khas yang dipengerusikan oleh Perdana Menteri, YAB Dato' Seri Anwar Ibrahim telah diadakan di Putrajaya pagi ini. Mesyuarat ini antara lain memberikan penekanan berkaitan perlakuan muat naik bahan yang mengandungi unsur provokatif, menggugat keharmonian dan menyentuh sensitiviti kedudukan institusi beraja, agama dan bangsa (3R – Ruler, Religion & Race) di platform media sosial.

Susulan itu, saya telah mengadakan perjumpaan antara Kementerian Komunikasi Digital, penyedia platform TikTok dan Suruhanjaya Komunikasi dan Multimedia Malaysia (SKMM) untuk mengutarakan kebimbangan dan keseriusan impak negatif daripada kandungan seumpama ini yang tersebarluas dalam kalangan masyarakat Malaysia yang majmuk, rencam dan harmoni.

Hasil perbincangan ini, pihak TikTok telah menyatakan hasrat dan komitmen untuk menjalin kerjasama strategik dengan Kementerian Komunikasi Digital melalui SKMM untuk segera membendung dan membanteras penyebaran kandungan berunsur provokatif dan bersifat ekstremis ini di media sosial yang mengganggu keharmonian pelbagai lapisan masyarakat dalam negara kita yang tercinta ini.

InshaAllah saya juga akan mengadakan beberapa lagi siri perjumpaan dengan penyedia platform media sosial yang lain bagi memastikan isu ini ditangani secara holistik dengan kadar segera.

AHMAD FAHMI BIN MOHAMED FADZIL
MENTERI KOMUNIKASI DIGITAL

5 Disember 2022